

四庫全書

集部

欽定四庫全書

東坡全集卷八

宋 蘇軾 撰

詩七十二首

和晁同年九日見寄

仰看鸞鵠刺天飛
富貴功名老不思
病馬已無千里志
騷人長負一秋悲
古來重九皆如此
別後西湖付與誰
遣子窮愁天有意
吳中山水要清詩

送喬施州

恨無負郭田二頃空有載行書五車江上青山橫絕壁

雲間細路躡飛蛇雞號黑暗通蠻貨

胡人謂犀為黑暗

蜂鬧黃

連採蜜花共怪河南門下客不應萬里向長沙

喬受知於吳丞

相而施州風土大類長沙

雪夜獨宿柏仙菴

晚雨纖纖變玉霏小菴高卧有餘清夢驚忽有穿窓片
夜靜惟聞瀉竹聲稍壓冬溫聊得健未濡秋旱若為耕
天公用意真難會又作春風爛漫晴

和孔郎中荆林馬上見寄

秋禾不滿眼宿麥種亦稀永愧此邦人芒刺在膚肌平
生五千卷一字不救饑方將怨無襦忽復歌緇衣堂堂
孔北海直氣凜羣兒朱輪未及郊清風已先馳何以累
君子十萬貧與羸滔滔滿四方我行竟安之何時劒關
路春山聞子規

留別雩泉

舉酒屬雩泉白髮日夜新何時泉中天復照泉上人二

年飲泉水魚鳥亦相親
還將弄泉手遮日向西秦

留別釋迦院牡丹呈趙倅

春風小院却來時
壁間惟見使君詩
應問使君何處去
憑花說與春風知
年年歲歲何窮已
花似今年人老矣
去年崔護若重來
前度劉郎在千里

董儲郎中嘗知眉州與先人遊過安丘訪其故居見其子希甫留詩屋壁

白髮郎潛舊使君
至今人道最能文
隻雞敢忘橋公語

下馬來尋董相墳冬月負薪雖得免隣人吹笛不堪聞
死生契濶君休問灑淚西南向白雲

劉貢父見余歌詞數首以詩見戲聊次其韻

十載漂然未可期那堪重作看花詩門前惡語誰傳去
醉後狂歌自不知刺舌君今猶未戒灸眉我亦更何辭
相從痛飲無餘事正是春容最好時

除夜大雪留澠州元日早晴遂行中塗雪復作
除夜雪相留元日晴相送東風吹宿酒瘦馬兀殘夢惹

曉曉光開旋轉餘花弄下馬成野酌佳哉誰與共須臾
晚雲合亂灑無缺空鵝毛垂馬駿自怪騎白鳳三年東
方早逃戶連歌棟老農釋耒歎淚入饑腸痛春雪雖云
晚春麥猶可種敢怨行役勞助爾歌飯甕

大雪青州道上有懷東武園亭寄交代孔周翰
超然臺上雪城郭山川兩奇絕海風吹碎碧琉璃時見
三山白銀闕蓋公堂前雪綠窓朱戶相明滅堂中美人
雪爭妍粲然一笑玉齒頰就中山堂雪更奇青松怪石

亂瓊絲惟有使君遊不歸五更上馬愁斂眉君不見淮
西李侍中夜入蔡州縛取吳元濟又不見襄陽孟浩然
長安道上騎驢吟雪詩何當閉門飲美酒無人毀譽河
東守

至濟南李公擇以詩相迎次其韻二首

弊裘羸馬古河濱野濶天低糝玉塵自笑餐糧典屬國
來看換酒謫仙人宦遊到處身如寄農事何時手自親
剩作新詩與君和莫因風雨廢鳴晨

夜擁笙歌雪水濱
回頭樂事總成塵
今年送汝作太守
到處逢君是主人
聚散細思都是夢
身名漸覺兩非親
相從繼燭何須問
蝙蝠飛時日正晨

和孔君亮郎中見贈

偶對先生盡一樽
醉看萬物洶崩奔
優遊共我聊卒歲
骯髒如君合倚門
只恐掉頭難久住
應須傾蓋便深論
固知巖勝風流在
又見長身十世孫

錢字君嚴
賤字君勝
退之志其墓云

孔子世三十八
吾見其孫白面
長身今君亮四十八世矣

送范景仁遊洛中

小人真闇事閒退豈公難道大吾何病言深聽者寒憂
時雖早白住世有還丹得酒相逢樂無心所遇安去年
行萬里蜀路走千盤投老身彌健登山意未闌西遊為
櫻筍東道盡鵝鷺杖履携兒去園亭借客看折花斑竹
寺弄水石樓灘驚馬衰憐白鷺雷怯笑韓蘄書標洞府
歐陽永叔嘗遊嵩山日莫於絕壁上見松蓋偃天壇試
苔蘚成文云神清之洞明日復尋不見與劉夫子重尋靖長官

劉几云曾見人嵩山幽絕處
眼光如猫意其為靖長官也

次韻景仁留別

公老我亦衰相見恨不數臨行一杯酒此意重山岳歌
詞白紵清琴弄黃鍾濁詩新眇難和飲少僅可學欲參
兵部選有力誰如榮且作東諸侯山城雄鼓角南遊許
過我不憚千里邈會當聞公來倒屣髮一握

書韓幹牧馬圖

南山之下汧渭之間想見開元天寶年八坊分屯隘秦
川四十萬疋如雲烟騅駟駟驪騮驪白魚赤兔驊皇

翰龍顧鳳頸擰且妍竒姿逸德隱鶩頑碧眼胡兒手足
鮮歲時翦刷供帝閑拓袍臨池侍三千紅粧照日光流
淵樓下玉螭吐清寒往來蹙踏生飛湍衆工舐筆和朱
鉛先生曹霸弟子韓廐馬多肉尻雕圓肉中畫骨誇尤
難金羈玉勒繡羅鞍鞭箠刻烙傷天全不如此圖近自
然平沙細草荒芊綿驚鴻脫兔爭後先王良挾策飛上
天何必俯首服短轅

送魯元翰少卿知衛州

冗士無處著寄身范公園桃花忽成陰
薺麥秀已繁閉門春晝永惟有黃蜂
喧誰人肯携酒共醉榆柳村髯卿獨
何者一月三到門我不往拜之髯來意
彌敦堂堂元老後疊疊仁人言憶在錢
塘歲情好均弟昆時於冰雪中笑語作
春溫欲飲徑相覓夜開叢竹軒搜尋到
篋笥鮓醢無復存每愧煙火中玉腕親
炮燂別來今幾何相對如夢魂告我當
北渡新詩侑清樽坡陀太行麓洶涌黃
河翻仕宦非不遇王畿西北垣斯民如
魚耳見網則

驚奔皎皎千丈清不如尺水渾刑政雖首務念當養其
源一聞襦袴音盜賊安足論

次韻子由送蔣夔赴代州學官

功利爭先變法初典刑獨守老成餘窮人未信詩能爾
倚市懸知繡不如代北諸生漸狂簡牀頭雜說為爬梳
歸來問雁吾何敢疾世王符解著書

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟

龍睡足亦解慚二麥枯時雨如洗不知雨從何處來但
聞呂梁百步聲如雷試上城南望城北際天菽粟青成
堆饑火燒腸作牛吼不知待得秋成否半年不雨坐龍
慵共怨天公不怨龍今朝一雨聊自贖龍神社鬼各言
功無功日盜太倉穀嗟我與龍同此責勸農使者不汝
容因君作詩先自効

宿州次韻劉涇

我欲歸休瑟漸希舞雩何日著春衣多情白髮三千丈

無用蒼皮四十圍晚覺文章真小技
早知富貴有危機
為君垂涕君知否
千古華亭鶴自飛

涇之兄汴亦有文死矣

和孔密州五絕

見邸家園留題

大旆傳聞載酒過
小詩未忍著塲磨
陽關三疊君須祕
除却膠西不解歌

來詩有渭城之句

春步西園見寄

歲歲開園成故事
年年行樂不辜春
今年太守尤難繼

金月日人
卷八
慈愛聰明惠利人

東欄梨花

梨花淡白柳深青
柳絮飛時花滿城
惆悵東欄二株雪
人生看得幾清明

和流杯石上草書小詩

蜂腰鶴膝嘲希逸
春蚓秋蛇病子雲
醉裏自書醒自笑
如今二絕更逢君

堂後白牡丹

城西千葉豈不好笑舞春風醉臉丹何似後堂冰玉潔

遊蜂非意不相干

孔頗有聲伎而客無見者

和趙郎中見戲

趙以徐伎不如東武詩中見戲云只有當時燕子樓

燕子人亡三百秋卷簾那復似揚州西行未必能勝此

空唱崔徽上白樓

又

我擎藤牀君唱歌明年六十奈君何醉顛只要衰風景

莫向人前自洗磨

趙每醉歌畢輒曰明年六十矣

和子由與顏長道同遊百步洪相地築亭種柳
平明坐衙不暖席歸來閉閣閒終日卧聞客至到展迎
兩眼蒙籠餘睡色城東泗水步可到路轉河洪翻雪白
安得青絲絡駿馬蹙踏飛波柳陰下奮身三丈兩蹄間
振鬣長鳴身自乾少年狂興久已謝但憶嘉陵遶劒關
劒關大道車方軌君自不去歸何難山中故人應大笑
築室種柳何時還

次韻李邦直感舊

駟騎傳呼出跨坊簿書填委入充堂誰教按部如何武
只許清樽對孟光婉婉有時來入夢溫柔何日聽還鄉
酸寒病守尤堪笑千步空餘僕射場

與梁先舒煥泛舟得臨釀字二首

彭城古戰國孤客勸登臨汴泗交流處清潭百丈深故
人輕千里足靈來相尋何以娛佳客潭水洗君心

老守厭簿書先生罷函丈風流魏晉間談笑羲皇上河
洪忽已過水色綠可釀君毋輕此樂此樂清且放

次韻荅邦直子由四首

簿書顛倒夢魂間，知我踈慵肯見原。
閒作閉門僧舍冷，病聞吹枕海濤喧。
忘懷杯酒逢人共，引睡文書信手翻。
欲吐狂言喙三尺，怕君瞋我却須吞。

邦直屢以此見戒

城南短李好交遊，箕踞狂歌總自由。
尊主庇民君有道，樂天知命我無憂。
醉呼妙舞留連夜，閒作清詩斷送秋。
瀟灑使君殊不俗，鑄前容我攬須不。

邦直家中歸者甚多

老弟東來殊寂寞，故人留飲慰酸寒。
草荒城角開新徑，

雨入河洪失舊灘車馬追陪迹未掃唱酬往復字應漫
此詩更欲憑君改待與江南子布看

君雖為我此遲留別後淒涼我已憂不見便同千里遠
退歸終作十年遊恨無揚子一區宅懶卧元龍百尺樓
聞道鷓鴣滿臺閣網羅應不到沙鷗

司馬君實獨樂園

青山在屋上流水在屋下中有五畝園花竹秀而野花
香襲杖履竹色浸盞斚樽酒樂餘春碁局消長夏洛陽

古多士風俗猶爾雅先生卧不出冠蓋傾洛社雖云與
衆樂中有獨樂者才全德不形所貴知我寡先生獨何
事四海望陶冶兒童誦君實走卒知司馬持此欲安歸
造物不我捨名聲逐吾輩此病天所赅撫掌笑先生年
來效喑啞

送顏復兼寄王鞏

彭城官居冷如水誰從我遊顏氏子我衰且病君亦窮
衰窮相守正其理胡為一朝捨我去輕衫觸熱行千里

問君無乃求之歟
荅我不然聊爾耳
京師萬事日日新
故人如故今有幾
君知牛行相君宅
扣門但覓王居士
清詩草聖俱入妙
別後寄我書連紙
苦恨相思不相見
約我重陽嗅霜蘂
君歸可喚與俱來
未應指目妨進擬
太一老仙閒不出
張安道為
太一官使踵門問道
今時矣因行過
我路幾何願君推
挽加鞭箠吾儕一
醉豈易得買羊釀
酒從今始

蠍虎

黃雞啄蠍如啄黍窓間守宮稱蠍虎閣中繳尾伺飛蟲
巧捷功夫在腰脊跂跂脉脉善緣壁陋質從來誰比數
今年歲旱號蜥蜴狂走兒童鬧歌舞能銜渠水作冰雹
便向蛟龍覓雲雨守宮努力搏蒼蠅明年歲旱當求汝
輒幼從子瞻兄讀書未嘗一日相舍既壯將遊

宦四方讀韋蘇州詩有云那知風雨夜復此
對牀眠惻然感之乃相約早退為閒居之樂
故子瞻始為鳳翔幕官留詩與輒曰夜雨何

時聽蕭瑟其後子瞻通守餘杭復移守膠西
而輒滯留於淮陽濟南不見者七年熙寧十
年二月始復會於澶濮之間相從彭城留百
餘日時宿於逍遙堂追感前約作二小詩

逍遙堂後千尋木長送中宵風雨聲
悵喜對牀尋舊約不知漂泊在彭城

秋來東閣涼如水客至山公醉似泥
困卧北窓呼不醒風吹松竹雨淒淒

子由將赴南都與余會宿於逍遙堂作兩絕句
讀之殆不可為懷因和其詩以自解余觀子
由自少曠達天資近道又得至人養生長年
之訣而余亦竊聞其一二以為今者宦遊相
別之日淺而異時退休相從之日長既以自
解且以慰子由云

別期漸近不堪聞風雨蕭蕭已斷魂猶勝相逢不相識
形容變盡語音存

但令朱雀長金花此別還同一轉車五百年間誰復在
會看銅狄兩洛嗟

留題石經院三首

慈菴門前路行穿翠密中却來堂上看巖谷意無窮
天矯庭中檜枯枝鵲踏消瘦皮纏鶴骨高頂轉龍腰
窈窕山頭井潛通伏澗清欲知深幾許聽放轆轤聲

過雲龍山人張天驤

郊原雨初足風日清且好病守亦欣然肩輿白門道荒

田咽蛭蚓村巷懸梨棗下有幽人居閉門空雀噪西風
高正厲落葉紛可掃孤僮卧斜日病馬放秋草墟里通
有無垣牆任推倒君家本冠蓋絲竹鬧隣保脫身聲利
中道德自濯澡躬耕抱羸疾奉養百歲老詩書膏吻頰
菽水媚翁媪饑寒天隨子杞菊自撷毛慈孝董邵南雞
狗相乳抱吾生如寄耳歸計失不早故山豈敢忘但恐
迫華皓從君學種秫斗酒時相勞

贈王仲素寺丞

名景純

養氣如養兒棄官如棄泥人皆笑子拙事定竟誰迷歸
耕獨患貧問子何所齋尺宅足自庇寸田有餘畦明珠
照短褐陋室生虹霓雖無孔方兄顧有法喜妻彈琴一
長嘯不答阮與嵇曹南劉夫子名與子政齊家有鴻寶
書不鑄金裹蹄促膝問道要遂蒙分刀圭不忍獨不死
尺書肯見梯我生本強鄙少以氣自擠孤舟倒江河赤
手攬象犀年來稍自笑留氣下暖臍苦恨聞道晚意象
颯已淒空見孫思邈區區賦病梨

陽關詞三首

受降城下紫髯郎戲馬臺南古戰場恨君不取契丹首
金甲牙旗歸故鄉

右贈張繼愿

濟南春好雪初晴行到龍山馬足輕使君莫忘霅溪女
時作陽關腸斷聲

右荅李公擇

暮雲收盡溢清寒銀漢無聲轉玉盤此生此夜不長好

明月明年何處看

右中秋月

和孔周翰二絕

再觀邸園留題

小園香霧曉蒙籠
醉手狂詞未必工
魯叟錄詩應有取
曲收彤管邺鄘風

觀淨觀堂效韋蘇州詩

弱羽巢林在一枝
幽人蝸舍兩相宜
樂天長短三千首

却愛韋郎五字詩

京師哭任遵聖

十年不還鄉兒女日夜長豈惟催老大漸復成凋喪每
聞耆舊亡涕泣聲輒放老任況竒逸先子推輩行文章
小得譽詩語尤清壯吏能復所長談笑萬夫上自喜作
劇縣偏工破豪黨奮髯走猾吏嚼齒對姦將哀哉命不
偶每以才得謗竟使落窮山青衫就黃壤宦遊久不樂
江海永相望退耕本就君時節相勞餉此懷今不遂歸

見纍纍堊望哭國西門落日銜千嶂平生惟一子抱負
珠在掌見之齟齬中已有食牛量他年如入浴生死一
相訪惟有王濬冲心知中散狀

荅任師中家漢公

先君昔未仕杜門皇祐初道德無貧賤風采照鄉閭何
嘗踈小人小人自濶踈出門無所詣老史在郊墟門前
萬竿竹堂上四庫書高樹紅消梨小池白芙蓉常呼赤
脚婢雨中擷園蔬矯矯任夫子罷官還舊廬是時里中

兒始識長者車烹雞酌白酒相對歡有餘有如龐德公
往還葛與徐妻子走堂下主人竟誰欺我時年尚幼作
賦慕相如侍立看君談精悍實起予歲月曾幾何耆老
逝不居史侯最先沒孤墳拱桑樗我亦涉萬里清血滿
襟袪漂流二十年始悟萬緣虛獨喜任夫子老佩刺史
魚威行烏白蠻解辦請冠裾方當入奏事清廟陳璫璫
胡為厭軒冕歸意不少紓上蔡有良田黃沙走清渠罷
亞百頃稻雍容十年儲閒隨李丞相搏射鹿與猪蒼鷹

十斤重猛犬如黃驢豈比陶淵明窮苦自把鋤我今四
十二衰髮不滿梳彭城古名郡乏人偶見除頭顱已可
知幾何不樵漁會當相從去芒鞋老舊畚念子瘴江邊
懷抱向誰攄賴我同年友相歡出同興冰盤薦文鮓鮓鮓
也戎瀟常有玉笋傾浮蛆醉中忽思我清詩綴瓊琚知我少
詆諆教我時卷舒世事日反覆翩如風中旛崔羅弔廷
尉秋扇悲婕妤好升沉一何速喜怒紛衆狙作詩謝二子
我師寧與蘧

初別子由

我少知子由天資和而清好學老益堅表裏漸融明豈
獨為吾弟要是賢友生不見六七年微言誰與賡常恐
坦率性放縱不自程會合亦何事無言對空枰使人之
意消不善無由萌森然有六女包裹布與荆無憂賴賢
婦藜藿等大烹使子得行意青衫陋公卿明日無晨炊
倒牀作雷鳴秋眠我東閣夜聽風雨聲懸知不久別妙
理重細評昨日忽出門孤舟轉西城歸來北堂上古屋

空嶢嶢退食悞相從
入門中自驚南都信
繁會人事水
火爭念當閉閣坐
頽然寄聾盲妻子
亦細事文章固虛
名會須掃白髮不
復用黃精

次韻呂梁仲屯田

雨葉風花日夜稀
一杯相屬竟何時
空虛豈敢酬瓊玉
枯朽猶能出菌芝
門外呂梁從迅急
胸中雲夢自逶遲
待君筆力追靈運
莫負南臺九日期

章質夫寄惠崔徽真

玉釵半脫雲垂耳亭亭芙蓉在秋水當時薄命一酸辛
千古華堂奉君子水邊何處無麗人近前試看丞相嗔
不如丹青不解語世間言語元非真知君被惱更愁絕
卷贈老夫驚老拙為君援筆賦梅花未害廣平心似鐵
王鞏屢約重九見訪既而不至以詩送將官梁
交且見寄次韻荅之交頗文雅不類武人家
有侍者甚惠麗

知君月下見傾城破恨懸知酒有兵老守無何惟日飲

將軍競病自詩鳴花枝不共秋歌帽筆陣空來夜斫營
愛惜微官將底用他年只好寫銘旌

臺頭寺雨中送李邦直赴史館分韻得憶字人
字無寄孫巨源二首

霜林日夜西風急老送君歸百憂集清歌窈眇入行雲
雲為不行天為泣紅葉黃花秋正亂白魚紫蟹君須憶
憑君說向髯將軍衰鬢相逢應不識

珥筆西歸近紫宸太平典冊不緣麟付君此事寧論晉

載我當時舊過秦門外想無千斛米墓中知有百年人
看君兩眼明如鏡休把春秋坐素臣

代書答梁先

此身與世真悠悠蒼顏華髮誰汝留強名太守古徐州
忘歸不如楚沐猴魯人豈獨不知丘隣藉夫子無罪尤
異哉梁子清而修不遠千里從我游瞭然正色懸雙眸
世之所馳子獨不一經通明傳節侯小措精絕規摹歐
陽公書

梁生學歐

我衰廢學懶且媮畏見問事賈長頭別來紅

葉黃花秋夜夢見之起坐愁遺我駁石盆與甌黑質白
章聲琳球謂言山石生澗溝追琢尚可王公羞感子佳
意能無酬反將木瓜報珍投學如富貴在博收仰取俛
拾無遺籌道大如天不可求修其可見致其幽願子篤
實慎勿浮發憤忘食樂忘憂

九日邀仲屯田為大水所隔以詩見寄次其韻
無復龍山對孟嘉西來河伯意雄夸霜風可使吹黃帽
舟人黃帽
土勝水也
導酒那能泛浪花謾遣鯉魚傳尺素却將燕

石報瓊華何時得見悲秋老醉裏題詩字半斜

河復并

叙

熙寧十年秋河決澶淵注鉅野入淮泗自澶魏以北皆絕流而濟楚大被其害彭門城下水二丈八尺七十餘日不退吏民疲於守禦十月十三日澶州大風終日既止而河流一枝已復故道聞之喜甚庶幾可塞乎乃作河復詩歌之道路以致民願而迎神休蓋守土者之志也

君不見西漢元光元封間河決瓠子二十年鉅野東傾
淮泗滿楚人恣食黃河鱸萬里沙回封禪罷初遣越巫
沉白馬河公未許人力窮薪芻萬計隨流下吾君仁聖
如帝堯百神受職河神驕帝遣風師下約束北流夜起
澶州橋東風吹凍收微渌神功不用淇園竹楚人種麥
滿河淤仰看浮槎棲古木

韓幹馬十四匹

二馬並驅攢八蹄二馬宛頸駿尾齊一馬任前雙舉後

一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓
此詩此畫誰當看

有言郡東北荆山下可以溝畎積水因與吳正
字王戶曹同往相視以地多亂石不果還遊
聖女山山有石室如墓而無棺槨或云宋司

馬桓雕墓二子有詩次其韻二首

側手區區未易遮奔流一瞬卷千家共疑智伯初圍趙
猶有張湯欲漕斜已坐迂疎來此地分將勞苦送生涯
使君下策真堪笑隱隱驚雷響踏車

茫茫清泗遶孤岑歸路相將得暫臨試著芒鞋穿犖确
更然松炬照幽深縱令司馬能鑱石奈有中郎解摸金
強寫蒼崖留歲月他年誰識此時心

贈寫御容妙善師

憶昔射策干先皇，珠簾翠幄分兩廂。
紫衣中使下傳詔，跪捧再拜聞天香。
仰觀眩晃目生暈，但見曉色開扶桑。
迎陽晚出步就坐，絳紗玉斧光照廊。
野人不識日月角，髣髴尚記重瞳光。
三年歸來真一夢，橋山松檜淒風霜。
天容玉色誰敢畫，老師古寺畫閉房。
夢中神授心有得，覺來信手筆已忘。
幅巾常服儼不動，孤臣入門涕自滂。
元老侑坐須眉古，虎臣立侍冠劔長。
平生慣寫龍鳳質，肯顧草間猿與麋。
都人踏破鐵門限，黃金白壁空堆牀。

爾來摹寫亦到我謂是先帝白髮郎不須覽鏡坐自了
明年乞身歸故鄉

哭刁景純

讀書想前輩每恨生不早紛紛少年場猶得見此老此
老如松栢不受霜雪槁直從毫末中自養到合抱宏材
乏近用千歲自枯倒文章餘正始風節貫華皓平生為
人耳自為薄如縞是非雖難齊反覆看愈好前年旅吳
越把酒慶壽考扣門無晨夜百過迹未掃但知從德公

未省厭丘嫂別時公八十後會知難保昨日故人書連
年喪翁媪景純妻先亡傷心范橋水漾漾舞寒藻華堂不見
人瘦馬空戀阜我欲江東去匏樽酌行潦鏡湖無賀監
慟哭稽山道忍見萬松岡荒池沒秋草

答呂梁仲屯田

亂山合沓圍彭門官居獨在懸水村

呂梁地名

居民蕭條雜

麋鹿小市冷落無雞豚黃河西來初不覺但訝清泗流
奔渾夜聞沙岸鳴甕盎曉看雪浪浮鵬鯢呂梁自古喉

吻地萬頃一抹何由吞坐觀入市巷閭井吏民走盡餘
王導計窮路斷欲安適吟詩破屋愁鳶蹲歲寒霜重水
歸壑但見屋瓦留沙痕入城相對如夢寐我亦僅免為
魚黿旋呼歌舞雜詼笑不惜飲釂空瓶盆念君官舍冰
雪冷新詩美酒聊相溫人生如寄何不樂任使絳蠟燒
黃昏宣房未築淮泗滿故道堙滅瘡痍存明年勞苦應
更甚我當畚鍤先黥髡付君萬指伐頑石千鎚雷動蒼
山根高城如鐵洪口決談笑却掃看崩奔農夫掉臂免

狼顧秋穀布野如雲屯還須更置軟脚酒為君擊鼓行
金樽

張寺丞益齋

張子作齋舍而以益為名吾聞之夫子求益非速成譬
如遠遊客日夜事征行今年適燕薊明年走蠻荆東觀
盡滄海西涉渭與涇歸來閉戶坐八方在軒庭又如學
醫人識病由飽更風雨晦明淫跛躄瘖聾盲虛實在其
脉靜躁在其情榮枯在其色壽夭在其形苟能閱千人


望見知死生為學務日益此言當自程為道貴日損此
理在既盈願君書此詩以為益齋銘

荅孔周翰求書與詩

身閒曷不長閉口天寒正好深藏手吟詩寫字有底忙
未脫多生宿塵垢不蒙譏訶子厚疾反更刻畫無鹽醜
征西自有家雞肥太白應驚飯山瘦與君相從知幾日
東風待得花開否撥棄萬事勿復談百觚之後耶辭酒

送李公恕赴闕

君才有如切玉刀見之凜凜寒生毛願隨壯士斬蛟蜃
不願腰間纏錦綵用違其才志不展坐與胥吏同疲勞
忽然眉上有黃氣吾君漸欲收英髦立談左右俱動色
一語徑破千言牢我頃分符在東武脫略萬事惟嬉遨
盡壞屏障通內外仍呼騎曹為馬曹君為使者見不問
反更對飲持雙螯酒酣箕坐語驚衆雜以嘲諷窮詩騷
世上小兒多忌諱獨能容我真賢豪為我買田臨汶水
逝將歸去誅蓬蒿安能終老塵土下俯仰隨人如桔槔



東坡全集卷八

欽定四庫全書

集部

東坡全集卷十九

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官編修臣徐立綱

謄錄監生臣章宗源

欽定四庫全書

東坡全集卷九

宋 蘇軾 撰

詩六十七首

春采

蔓菁宿根已生葉
韭牙戴土拳如巖
爛烝香薺白魚肥
碎點青蒿涼餅滑
宿酒初消春睡起
細履幽畦掇芳辣
茵陳甘菊不負渠
繪縷堆盤纖手抹
北方苦寒今未已
雪底波稜如鐵甲
豈如吾蜀富冬蔬
霜葉露芽寒更茁

久拋菰葛猶細事苦筍江豚那忍說明年投効徑須歸
莫待齒搖并髮脫

送鄭戶曹

游遍錢塘湖上山歸來文字帶芳鮮羸僮瘦馬從吾飲
陋巷何人似子賢公業有田常乏食廣文好客竟無氈
東歸不趁花時節開盡春風誰與妍

虔州八境圖八首

坐看奔湍遶石樓使君高會百無憂三犀竊鄙秦太守

八詠聊同沈隱侯

濤頭寂寞打城還
章貢臺前暮靄寒
勸客登臨無限思
孤雲落日長安

白鵲樓前翠作堆
縈雲嶺路若為開
故人應在千山外
不寄梅花遠信來

朱樓深處日微明
皂蓋歸時酒半醒
薄暮漁樵人去盡
碧溪青嶂遶螺亭

使君那暇日參禪
一望叢林一悵然
成佛莫教靈運後

着鞭從使祖生先

却從塵外望塵中無限樓臺煙雨濛
山水照人迷向背只尋孤塔認西東

煙雲縹渺鬱孤臺積翠浮空雨半開
想見之罍觀海市絳宮明滅是蓬萊

回峰亂嶂鬱參差雲外高人世得知
誰向空山弄明月山中木客解吟詩

讀孟郊詩二首

夜讀孟郊詩細字如牛毛寒燈照昏花佳處時一遭孤
芳擢荒穢苦語餘詩騷水清石鑿鑿湍激不受篙初如
食小魚所得不償勞又似煮彭蠡竟日嚼空螯要當關
僧清未足當韓豪人生如朝露日夜火消膏何苦將兩
耳聽此寒蟲號不如且置之飲我玉卮醪

我憎孟郊詩復作孟郊語饑腸自鳴喚空壁轉饑鼠詩
從肺腑出出輒愁肺腑有如黃河魚出膏以自煮尚愛
銅斗歌鄙俚頗近古挑弓射鴨罷獨速短蓑舞不憂踏

船翻踏浪不踏土吳姬霜雪白赤脚浣白紵嫁與踏浪兒不識離別苦歌君江湖曲感我長羈旅

訪張山人得山中字二首

魚龍隨水落猿鶴喜君還舊隱丘墟外新堂紫翠間野麋馴杖屨幽桂出榛菅灑掃門前路山公亦愛山

張故居為

大水所壞新卜此室故居之東

萬木鎖雲龍

山名

天留與戴公路迷山向背人在灤西東

薺麥餘春雪櫻桃落晚風入城都不記歸路醉眠中

送孔郎中赴陝郊

驚風擊面黃沙走西出嶠函脫塵垢使君來自古徐州
聲振河潼殷關右十里長亭聞鼓角一川秀色明花柳
北臨飛檻卷黃流南望青山如峴首東風吹開錦繡谷
涿水翻動蒲萄酒訟庭生草數開樽過客如雲牢閉口
與梁左藏會飲傳國博家

將軍破賊自草檄論詩說劍俱第一彭城老守本虛名
識字劣能欺項籍風流別駕貴公子欲把笙歌暖鋒鏑

紅旆朝開猛士噪翠帷暮卷佳人出東堂醉卧呼不起
啼鳥落花春寂寂試教長笛傍耳根一聲吹裂堦前石

寒食日荅公擇三絕次韻

從來蘇李得名雙只恐全齊笑陋邦詩似懸河供不辦
故欺張籍隴頭瀧

簿書鑿鼓不知春佳句相呼賴故人寒食得公方上冢
歸來誰主復誰賓

巡城已困塵埃眯執朴仍遭蟻蝨緣欲脫布衫攜素手

試開病眼點黃連

來詩謂僕
布衫督役

約公擇飲是日大風

先生生長匡廬山山中讀書三十年舊聞飲水師顏淵
不知治劇乃所便偷兒夜探赤白丸奮髯忽逢朱子元
半年羣盜誅七百誰信家書藏九千春風無事秋月閒
紅粧執樂豪且妍紫衫玉帶兩部全琵琶一抹四十絃
客來留飲不計錢齊人愛公如子產兒啼卧路呼不還
我慚山郡空留連牙兵部吏笑我寒邀公飲酒公無難

約束官奴買花鈿薰衣理鬢夜不眠曉來顛風塵暗天
我思其由豈坐慳作詩愧謝公笑謹歸來瑟縮愈不安
要當啖公八百里豪氣一洗儒生酸

座上賦戴花得天字

清明初過酒闌珊折得奇葩晚更妍春色豈關吾輩事
老狂聊作座中先醉吟不耐歌紗帽起舞從教落酒船
結習漸消留不住却須還與散花天

夜飲次韻畢推官

簿書叢裏過春風酒聖時時且復中紅燭照庭嘶驀裏
黃雞催曉唱玲瓏老來漸減金釵興醉後空驚玉筋工
月未上時應早散免教壑谷問吾公

續麗人行

李仲謀家有周昉畫背面欠伸內人極精戲
作此詩

深宮無人春日長沉香亭北百花香美人睡起薄梳洗
燕舞鶯啼空斷腸畫工欲畫無窮意背立東風初破睡

若教回首却嫣然陽城下蔡俱風靡杜陵饑客眼長寒
蹇驢破帽隨金鞍隔花臨水時一見只許腰支背後看
心醉歸來茅屋底方信人間有西子君不見孟光舉案
與齊眉何曾背面傷春啼

聞李公擇飲傳國博家大醉二首

兒童拍手鬧黃昏應笑山公醉習園縱使先生能一石
主人未肯獨留髡

不肯惺惺騎馬迴玉山知為玉人頽紫雲有語君知否

莫喚分司御史來

起伏龍行

并叙

徐州城東二十里有石潭父老云與泗水通增損清濁
相應不差時有河魚出焉元豐元年春旱或云置虎頭
潭中可以致雷雨用其說作起伏龍行一首

何年白竹千鈞弩射殺南山雪毛虎至今顱骨帶霜牙
尚作四海毛蟲祖東方久旱千里赤三月行人口生土
碧潭近在古城東神物所蟠誰敢侮上歌蒼石擁巖竇

下應清河通水府眼光作電走金蛇鼻息為雲擢煙縷
當年負圖傳帝命左右義軒詔神禹爾來懷寶但貪眠
滿腹雷霆瘖不吐赤龍白虎戰明日

是月丙辰
明日庚寅

倒卷黃

河作飛雨嗟吾豈樂關兩雄有事徑須煩一怒

聞公擇過雲龍張山人輒往從之公擇有詩戲
用其韻

我生固多憂肉食常苦墨軒然就一笑猶得好飲力聞
君過雲龍對酒兩靜默急攜清歌女出郭及未昃一歡

難力致邂逅有勝特喧蜂集晚花亂雀啁叢棘山人樂
此耳寂寞誰侍側何當求好人聊使治要襍使君自孤
憤此理誰相直不如學養生一氣服千息

送李公擇

嗟余寡兄弟四海一子由故人雖云多出處不我謀弓
車無停招逝去勢莫留僅存今幾人各在天一隅有如
長庚月到曉爛不收宜我與夫子相好手足侔比年兩
見之賓主更獻酬樂哉十日飲衍衍和不流論事到深

夜僵仆鈴與騶頗嘗見使君有客如此不欲別不忍言
慘慘集百憂念我野夫兄知名三十秋已得其為人
不待風馬牛他年林下見傾蓋如白頭

送筍芍藥與公擇二首

久客厭虜饌

蜀人謂東北人虜子

枵然思南烹故人知我意千里

寄竹萌駢頭玉嬰兒一一脫錦裯庖人應未識旅人眼
先明我家拙厨膳蔬肉芼蕪菁送與江南客燒煮配香

粳

今日忽不樂折盡園中花園中亦何有芍藥裊殘葩久
早復遭雨紛披亂泥沙不折亦安用折去還可嗟棄擲
亮未能送與謫仙家還將一枝春插向兩髻丫

和孫莘老次韻

去國光陰春雪消還家蹤迹野雲飄功名正自妨行樂
迎送纔堪博早朝雖去友朋親吏卒却辭讒謗得風謠
明年我亦江東去不問繁華與寂寥

游張山人園

壁間一軸煙蘿子盆裏千枝錦被堆慣與先生為酒伴
不嫌刺史亦顏開纖纖入麥黃花亂颯颯催詩白雨來
聞道君家好井水歸軒乞得滿瓶回

杜介熙熙堂

崎嶇世路最先回窈窕華堂手自開咄咄何曾書怪事
熙熙長覺似春臺白砂碧玉味方永黃紙紅旗心已灰
遙想閉門投轄飲鷗絃鐵撥響如雷

次韻荅劉涇

吟詩莫作秋蟲聲天公怪汝鈎物情使汝未老華髮生
芝蘭得雨蔚青青何用自燔以出馨細書千紙雜真行
新音百變口如鶩異議蜂起弟子爭舌翻濤瀾卷齊城
萬卷堆胸兀相撐以病為樂子未驚我有至味非煎烹
是中之樂吁難名綠槐如山閣廣庭飛蟲繞耳細而清
敗席展轉卧看經亦自不嫌翠織成意行信足無溝坑
不識五郎呼作卿吏民哀我老不明相戒毋復煩鞭刑
時臨泗水照星星微風不起鏡面平安得一舟如葉輕

卧聞郵籤報水程
蓴羹羊酪不須評
一飽且救饑腸鳴
攜妓樂游張山人園

大杏金黃小麥熟
墮巢乳鵲拳新竹
故將俗物惱幽人
細馬紅粧滿山谷
提壺勸酒意雖重
杜鵑催歸聲更速
酒闌人散却闌門
寂歷斜陽挂疎木

種德亭

并叙

處士王復家於錢塘
為人多技能而醫尤精
期於活人而已
不志於利
築室候潮門外
治園圃作亭榭以與賢

士大夫游惟恐不及然終無所求人徒知其接花藝果之勤而不知其所種者德也乃以名其亭而作詩以遺之

小圃旁城郭閉門芝朮香名隨市人隱德與佳木長元化善養性倉公多禁方所活不可數相逢旋相忘但喜賓客來置酒花滿堂我欲東南去再觀雙檜蒼山茶想出屋湖橘應過墻木老德亦熟吾言豈荒唐

文與可有詩見寄云待將一段鵝溪絹掃取寒

稍萬尺長次韻荅之

為愛鵝溪白蠟光
掃殘雞距紫毫鉞
世間那有千尋竹
月落庭空影許長

聞辯才法師復歸上天竺以詩戲問

道人出山去
山色如死灰
白雲不解笑
青松有餘哀
忽聞道人歸
鳥語山容開
神光出寶髻
法雨洗浮埃
想見南北山
花發前後臺
寄聲問道人
借禪以為詎
何所聞而去
何所見而回
道人笑不荅
此意安在哉
昔年本不

住今者亦無來此語竟非是且食白楊梅

和子由送將官梁左藏仲通

雨足誰言春麥短城堅不怕秋濤卷日長惟有睡相宜
半脫紗巾落紈扇芳草不鋤當戶長珍禽獨下無人見
覺來身世都是夢坐久枕痕猶著面城西忽報故人來

急掃風軒炊麥飯

徐州所出

伏波論兵初矍鑠中散談仙更

清遠南都從事亦學道不卹腸空誇腦滿問羊他日到

金華應許相將游閬苑

黃初平之兄尋其弟於金華山

次韻秦觀秀才見贈秦與孫莘老李公擇甚熟
將入京應舉

夜光明月非所投逢年遇合百無憂將軍百戰竟不侯
伯郎一斗得涼州翹關負重君無力十年不入紛華域
故人坐上見君文謂是古人吁莫測新詩說盡萬物情
硬黃小字臨黃庭故人已去君未到空吟河畔草青青
誰謂他鄉各異縣天遣君來破吾願一聞君語識君心
短李髯孫眼中見江湖放浪久全真忽然一鳴驚倒人

從橫所值無不可知君不怕新書新千金弊帚那堪換
我亦淹留豈長筭山中既未決同歸我聊爾耳君其漫
僕曩於長安陳漢卿家見吳道子畫佛碎爛可
惜其後十餘年復見之於鮮于子駿家則已
裝背完好子駿以見遺作詩謝之

貴人金多身復閒爭買書畫不計錢已將鐵石充逸少

殷鐵石梁武帝時人今法帖大王書中有鐵石字

更補朱繇為道玄

世所收吳畫多朱繇

筆煙熏屋漏裝玉軸鹿皮蒼壁知誰賢吳生畫佛本神

授夢中化作飛空仙覺來落筆不經意神妙獨到秋毫
顛我昔長安見此畫歎惜至寶空潜然素絲斷續不忍
看已作胡蝶飛聯翩君能收拾為補綴體質散落嗟神
全誌公髣髴見刀尺修羅天女猶雄妍如觀老杜飛鳥
句脫字欲補知無緣問君乞得良有意欲將俗眼為洗
滌貴人一見定羞忤錦囊千紙何足捐不須更用博麻
縷付與一炬隨飛煙

雨中過舒教授

疎疎簾外竹，瀏瀏竹間雨。窓扉靜無塵，几硯寒生霧。美人樂幽獨，有得緣無慕。坐依蒲褐禪，起聽風甌語。客來淡無有，灑掃涼冠屨。濃茗洗積昏，妙香淨浮慮。歸來北堂闌，一一微螢度。此生憂患中，一餉安閒處。飛鳶悔前笑，黃犬悲晚悟。自非陶靖節，誰識此間趣。

次韻舒教授寄李公擇

草書妙絕吾所兄，真書小低猶抗行。論文作詩俱不敵，看君談笑收降旌。去年逾月方出晝，

予去年留齊月餘

為君劇

飲幾濡首今年過我雖少留寂寞陶潛方止酒

此行公擇病酒

夕不飲

別時流涕攬君鬚懸知此歡墮空虛松下從橫餘

屐齒門前輾轉想君車怪君一身都是德近之清潤淪

肌骨細思還有可恨時不許藍橋見傾國

公擇有婢名雲英屢欲出

不果

送鄭戶曹

水遶彭城樓山圍戲馬臺古來豪傑地千歲有餘哀隆
準飛上天重瞳亦成灰白門下呂布大星隕臨淮尚想

劉德輿置酒此徘徊爾來苦寂寞廢圃多蒼苔河從百
步響山到九里回山水自相激夜聲轉風雷蕩蕩清河
濡黃樓我所開秋月墮城角春風搖酒杯遲君為坐客
新詩出瓊瑰樓成君已去人事固多乖他年君倦游白
首賦歸來登樓一長嘯使君安在哉

次韻黃魯直見贈古風二首

佳穀卧風雨良莠登我場陳前漫方丈玉食慘無光大
哉天宇間美惡更臭香君看五六月飛蚊殷回廊茲時

不少暇俛仰霜葉黃期君蟠桃枝千歲終一嘗顧我如
苦李全生依路傍紛紛不足愠悄悄徒自傷

空山學仙子妄意笙簫聲千金得奇藥開視皆狶苓不
知市人中自有安期生今君已度世坐閱霜中蒂摩挲
古銅人歲月不可計閩風安在哉要君相指似

次韻荅舒教授觀余所藏墨

異時長笑王會稽野鷺臙腥汗刀几莫年却得庾安西
自厭家雞題六紙二子風流冠當代顧與兒童爭愠喜

秦王十八已龍飛嗜好晚將蛇蚓比我生百事不挂眼
時人繆說云工此世間有癖念誰無傾身障簾尤堪鄙
一生當著幾兩屐定心肯為微物起此墨足支三十年
但恐風霜侵髮齒非人磨墨磨人瓶應未罄壘先恥
逝將振衣歸故國數畝荒園自鋤理作書寄君君莫笑
但覓來禽與青李一螺點漆便有餘萬竈燒松何處使
君不見永寧第中擣龍麝列屋閒居清且美倒暈連眉
秀嶺浮雙鴉畫鬢香雲委時聞五斛賜蛾綠不惜千金

求懶髓聞君此詩當大笑寒窓冷硯冰生水

送鄭戶曹賦席上果得榘子

彼美玉山果粲為金盤實瘴霧脫蠻溪清樽奉佳客客
行何以贈一語當加璧祝君如此果德膏以自澤驅攘
三彭仇已我心腹疾願君如此木凜凜傲霜雪斲為君
倚几滑淨不容削物微興不淺此贈毋輕擲

送胡掾

亂葉和淒雨投空如散絲流年一如此游子去何之節

義古所重艱危方自茲他時著清德仍復畏人知

荅仲屯田次韻

秋來不見漢陂岑千里詩盟忽重尋大木百圍生遠籟
朱絃三歎有遺音清風卷地收殘暑素月流天掃積陰
欲遣何人賡絕唱滿階桐葉候蟲吟

密州宋國博以詩見紀在郡雜詠次韻荅之

吾觀二宋文字字照縑素淵源皆有考奇嶮或難句後
來邈無繼嗣子其殆庶胡為尚流落用舍真有數當時

苟悅可慎勿笑杖杜斲窓誰赴救袖手良優裕山城辱
吾繼缺短煩遮護昔年繆陳詩無人聊瓦注于今賡絕
唱外重中已懼何當附家集擊壤追咸漢

荅范祖禹

吾州下邑生劉季誰數區區張與李

來詩有張僕射李臨淮之句重

曠遺迹已塵埃惟有黃樓臨泗水

郡有廳事俗謂之霸王廳相傳不可坐僕

拆之以蓋黃樓

而今太守老且寒俠氣不洗儒生酸猶勝白門

窮呂布欲將鞍馬事曹瞞

次韻荅王定國

每得君詩如得書
宣心寫妙書不如眼前百種無
不有知君一以詩驅除
傳聞都下十日雨青泥沒馬街
生魚舊雨來人今不來
油然獨酌卧清虛堂名我雖作郡古云
樂山川信美非吾廬
願君不廢重九約
念此衰冷勤呵噓

芙蓉城

并叙

世傳王迥字子高與仙人周瑤英游芙蓉城元豐元年

三月余始識子高問之信然乃作此詩極其情而歸之
正亦變風止乎禮義之意也

芙蓉城中花冥冥誰其主者石與丁珠簾玉樓翡翠屏
雲舒霞卷千倂停中有一人長眉青炯如微雲淡疎星
往來三世空鍊形竟坐誤讀黃庭經天門夜開飛爽靈
無復白日乘雲輶俗緣千劫磨不盡翠被冷落淒餘馨
因過緱山朝帝廷夜聞笙簫弭節聽飄然而來誰使令
皎如明月入窓櫺忽然而去不可執寒衾虛幌風泠泠

仙宮洞房本不局夢中同躡鳳凰翎徑渡萬里如奔霆
玉樓浮空聳亭亭天書雲篆誰所銘遶樓飛步高玲玕
仙風鏘然韻流鈴遽遽形開如酒惺芳卿寄謝空丁寧
一朝覆水不返瓶羅巾別淚空熒熒春風花開秋葉零
世間羅綺紛臙腥此生流浪隨滄溟偶然相值兩浮萍
願君收視觀三庭勿與嘉穀生蝗螟從渠一念三千齡
下作人間尹與邢

和鮮于子駿鄆州新堂月夜二首

前次韻
後不次

去歲游新堂春風雪消後池中半篙水池上千尺柳佳
人如桃李胡蝶入衫袖山川今何許疆野已分宿歲月
不可思駛若船放溜繁華真一夢寂寞兩榮朽惟有當
時月依然照杯酒應憐船上人坐穩不知漏

明月入華池反照池上堂堂中隱几人心與水月涼風
螢已無迹露草時有光起觀河漢流步屨響長廊名都
信繁會千指調絲簧先生病不飲童子為燒香獨作五
字詩清絕如韋郎詩成月漸側皎皎兩相望

送將官梁左藏赴莫州

燕南垂趙北際其間不合大如礪至今父老哀公孫
燕土為城鐵作門城中積穀三百萬猛士如雲驕不戰
一朝鼓角鳴地中帳下美人空掩面豈如千騎平時來
笑談謦欬生風雷葛巾羽扇紅塵靜投壺雅歌清燕開
東方健兒虓虎樣泣涕懷思庶恥將彭城老守亦凄然
不見君家雪兒唱

次韻子由送趙屺歸覲錢塘遂赴永嘉

歸舟轉河曲稍見楚山蒼候吏來迎客吳音已帶鄉言
從謝康樂先獻魯靈光已擊三千里何須四十強風流
半刺史清絕校書郎到郡詩成集尋溪水濺裳芒鞋隨
採藥蠶紙記流觴海靜蛟鼉出山空草木長宦游無遠
近民事要更嘗願子傳家法他年請尚方

中秋月三首

殷勤去年月澹灩古城東憔悴去年人卧病破窓中徘徊
巧相覓窈窕穿房櫳月豈知我病但見歌樓空撫枕

三歎息扶杖起相從天風不相哀吹我落瓊宮白露入
肝肺夜吟如秋蟲坐令太白豪化為東野窮餘年知幾
何佳月豈屢逢寒魚亦不睡竟夕相唼喁

六年逢此月五年照離別

中秋有月九六年矣惟
去歲與子由會於此

歌君

別時曲滿坐為淒咽留都信繁麗此會豈輕擲鎔銀百
頃湖挂鏡千尋闕三更歌吹罷人影亂清樾歸來北堂
下寒光翻露葉喚酒與婦飲念我向兒說豈知衰病後
空盞對梨栗但見古河東麴麥如鋪雪欲和去年曲復

恐心斷絕

舒子在汶上閉門相對清

舒煥試舉人鄆州

鄭子向河朔

鄭僅赴北

京戶曹

孤舟連夜行頓子雖咫尺如在牢扃

頓起來徐試舉人

趙子寄書來水調有餘聲

今日得趙杲卿書猶記余在東武中秋所作水調歌頭

悠哉四子心共此千里明明月不解老良辰難合并回

顧坐上人聚散如流萍嘗聞此宵月萬里同陰晴

故人生

為余言嘗見海賈云中秋有月則是歲珠多而圓賈人常以此候之雖相去萬里他日會合相問陰晴無不同者
天公自著意此會那可輕明年各相望俯仰今古情

中秋見月寄子瞻

西風吹暑天益高明月耿耿分秋毫彭城閉門青嶂合
坐聽百步鳴飛濤使君携客登燕子月色著人如著水
筵前不設鼓與鐘處處笛聲相應起浮雲卷盡流金丸
戲馬臺西山鬱蟠杯中潒酒一時盡衣上白露三更寒
扁舟明日浮古汴回首逡巡陵谷變河吞巨野入長淮
城沒黃流只三板明年築城似山伐木為堤堤更堅
黃樓未成河已退空有遺迹令人看城頭看月應更好

河流深處今生草子孫免被魚鼈食歌舞聊寬使君老
南都從事老更貧羞見青天月照人飛鶴投籠不能出
曾是彭城坐中客

和子由中秋見月

明月未出羣山高瑞光千丈生白毫一杯未盡銀闕涌
亂雲脫壞如崩濤誰為天公洗眸子應費明河千斛水
遂令冷看世間人照我湛然心不起西南火星如彈丸
角尾奕奕蒼龍蟠今宵注眼看不見更許螢火爭清寒

何人艤舟臨古汴，千燈夜作魚龍變。曲折無心逐浪花，

低昂赴節隨歌板。

是夜賈客舟中放水燈

青熒滅沒轉前山，浪颭

風迴，豈復堅明月，易低人易散。歸來呼酒更重看，堂前

月色愈清好，咽咽寒蛩鳴露草。卷簾推戶寂無人，窓下

唧唧惟楚老。

近有一孫名楚老

南都從事莫羞貧，對月題詩有

幾人。明朝人事隨日出，恍然一夢瑤臺客。

答王鞏

鞏將見過有詩自謂惡客戲之

汴泗遶吾城，城堅如削鐵。中有李臨淮，號令肝膽裂。古

來彭城守未省怕惡客惡客云是誰祥符相公孫是家
豪逸生有種千金一擲頗黎盆連車載酒來不飲外酒
嫌其村子有干瓶酒我有萬株菊任子滿頭插團團見
花不見目醉中插花歸花重壓折軸問客何所須客言
我愛山青山自遶郭不要買山錢此外有黃樓樓下一
河水美哉洋洋乎可以療饑并洗耳彭城之遊樂復樂
客惡何如主人惡

次韻王定國馬上見寄

昨夜霜風入袂衣曉來病骨更支離疎狂似我人誰顧
坎軻憐君志未移但恨不携桃葉女尚能來趁菊花時
南臺二謝無人繼直恐君詩勝義熙

二謝從宋武帝
九日燕戲馬臺

與頓起孫勉泛舟探韻得未字

窓前堆梧桐牀下鳴絡緯佳人尺書到客子中夜喟朝
來一樽酒晤語聊自慰秋蠅已無聲霜蟬初有味當為
壯士飲眦裂須磔蝟勿作兒女懷坐念蟪蛄畏山城亦
何有一笑瀉肝胃泛舟以娛君魚鼈多可餽縱為十日

飲未遽主人費吾儕俱老矣耿耿知自貴寧能傍門戶
啼笑雜猩猩要將百篇詩一吐千丈氣蕭條歲行莫迨
此霜雪未明朝出城南遺迹觀楚魏西風迫吹帽金菊
亂如沸願君勿言歸輕別吾所諱

次韻荅頓起二首

挽袖推腰踏破紳舊聞携手上天門相逢應覺聲容似
欲話先驚歲月奔新學已皆從許子諸生猶自畏何蕃
殿廬直宿真如夢猶記憂時策萬言

頓君及第時余為
殿試編排官見其

荅策語頗直其後與子由試舉人西京既罷同登
嵩山絕頂嘗見其唱酬詩十餘首頓詩中及之

十二東秦比漢京去年古寺共題名

去歲見之於青州

早衰怪

我遽如許苦學憐君太瘦生茆屋擬歸田二頃金丹終
掃雪千莖何人更似蘓司業和遍新詩滿洛城

東坡全集卷九

欽定四庫全書

東坡全集卷十

宋 蘇軾 撰

詩四十七首

九日黃樓作

去年重陽不可說
南城夜半千漚發
水穿城下作雷鳴
泥滿城頭飛雨滑
黃花白酒無人問
日暮歸來洗韉韞
豈知還復有今年
把琖對花容
一呷莫嫌酒薄紅粉陋
終勝泥中事鋤鉤
黃樓新成壁未乾
清河已落霜初殺

朝來白露如細雨南山不見千尋刹樓前便作海茫茫
樓下空聞櫓鴉軋薄寒中人老可畏熱酒澆腸氣先壓
煙消日出見漁村遠水鱗鱗山齧齧詩人猛士雜龍虎
坐客三十餘人多知名之士 楚舞吳歌亂鵝鴨一杯相屬君勿辭此
境何殊泛清雪

太虛以黃樓賦見寄作詩為謝

我在黃樓上欲作黃樓詩忽得故人書中有黃樓詞黃
樓高十丈下建五丈旗楚山以為城泗水以為池我詩

無傑句萬景驕莫隨夫子獨何妙雨電散雷椎雄詞雜
今古中有屈宋姿南山多磐石清滑如流脂朱蠟為摹
刻細妙分毫釐佳處未易識當有來者知

九日次韻王鞏

我醉欲眠君罷休已教從事到青州髮霜饒我三千丈
詩律輸君一百籌聞道郎君閉東閣且容老子上南樓
相逢不用忙歸去明日黃花蝶也愁

送頊起

客路相逢難為樂，常不足臨行挽衫袖。
更賞折殘菊，佳人亦何念。淒斷陽關曲，酒闌不忍去。
共接一寸燭，留君終無窮。歸駕不免促，岱宗已在眼。
一往繼前躅，天門四十里。夜看扶桑浴，回頭望彭城。
大海浮一粟，故人在其下。塵土相脣蹴，惟有黃樓詩。
千古配淇澳。

類有詩記黃樓本末

送孫勉

昔年罷東武，曾過北海縣。白河翻雪浪，黃土如烝麴。
桑麻冠東方，一熟天下賤。是時累饑饉，常苦盜賊變。
每憐

追胥官野宿風裂面君為淮南秀文采照金殿

君嘗考中進士

第一

胡為事奔走投筆腰羽箭更被髯將軍豪篇來督

戰

其兄華老以詩寄之皆言戰事

親程三郡士玉石不能銜欲知君得

人失者亦稱善君才無不可要欲經百鍊吾詩堪咀嚼
聊送別酒嚙

李思訓畫長江絕島圖

山蒼蒼江茫茫大孤小孤江中央崖崩路絕猿鳥去惟
有喬木攬天長客舟何處來棹歌中流聲抑揚沙平風

金方石卷十
軟望不到孤山久與船低昂
峩峩兩煙鬟曉鏡開新粧
舟中賈客莫漫狂小孤前年嫁彭郎

次韻荅王翠

我有方外客顏如瓊之英
十年塵土窟一寸冰雪清
竭來從我逃坦率見真情
顧我無足戀戀此山水清新詩
如彈丸脫手不整停
昨日放魚回衣襟滿浮萍
今日扁舟去白酒載烏程
山頭見月出江路聞鼃鳴
莫作孺子歌滄浪濯吾纓
吾詩自堪唱相子棹歌聲

張安道見示近詩

人物一衰謝微言難重尋殷勤永嘉末復聞正始音清
談未足多感時意殊深少年有奇志欲和南風琴荒林
蝸蝨亂廢沼蛙蝮淫遂欲掩兩耳臨文但噫齋蕭然王
郎子來自緱山陰其壻王鞏携來云見浮丘伯吹簫明月岑遺
聲落淮泗蛟鼉為悲吟願公正王度祈招繼惛惛

次韻王鞏顏復同泛舟

沈郎清瘦不勝衣邊老便便帶十圍蹀躞身輕山上走

謹呼船重醉中歸舞腰似雪金釵落談辯如雲玉塵揮
憶在錢塘正如此回頭四十二年非

次韻張十七九日贈子由

千戈萬槩擁篲籬九日清樽豈復持

是日南都
敕使按兵

官事無

窮何日了菊花有信不吾欺逍遙瓊館真堪羨取次塵
纓未可縻迨此暇時須痛飲他年長劒拄君頤

次韻王鞏獨眠

居士身心如槁木旅館孤眠體生粟誰能相思琢白玉

服藥千朝償一宿天寒日短銀燈續欲往從之車脫軸
何人吹斷參差竹泗水茫茫鴨頭綠

次韻王鞏留別

去國已八年故人今有誰當時交游內未數蔡克兒豈
無知我者好爵半已縻爭為東閣吏不顧北山移公子
表獨立與世頗異馳不辭千里遠成此一段奇蛾眉亦
可憐無奈思餅師無人伴客寢惟有支牀龜君歸與何
人文字相娛嬉持此調張子一笑當脫頤

登雲龍山

醉中走上黃茆岡滿岡亂石如羣羊岡頭醉倒石作牀
仰看白雲天茫茫歌聲落谷秋風長路人舉首東南望
拍手大笑使君狂

次韻僧潛見贈

道人胸中水鏡清萬象起滅無逃形獨依古寺種秋菊
要伴騷人餐落英人間底處有南北紛紛鴻鴈何曾冥
閉門坐穴一禪榻頭上歲月空崢嶸今年偶出為求法

欲與慧劍加磐硯雲衲新磨山水出霜髭不翦兒童驚
公侯欲識不可得故知倚市無傾城秋風吹夢過淮水
想見橘柚垂空庭故人各在天一角相望落落如晨星
彭城老守何足顧桑林桑野相邀迎千山不憚荒店遠
兩脚欲赴飛猿輕多生綺語磨不盡尚有宛轉詩人情
猿吟鶴唳本無意不知下有行人行空堦夜雨自清絕
誰使掩抑啼孤惻我欲仙山招瑤草傾筐坐歎何時盈
簿書鞭扑晝填委煮茗燒栗宜宵征乞取摩尼照濁水

共看落月金盆傾

次韻潛師放魚

法師說法臨泗水無數天花隨麈尾
勸將淨業種西方莫待夢中呼起起
哀哉若魚竟坐口遠愧知幾穉生醴
况逢孟簡對盧仝不怕校人欺子美
疲民尚作魚尾赤數畧未除吾顙泚
法師自有衣中珠不用辛苦沙泥底
與舒教授張山人參寥師同遊戲
馬臺書西軒壁魚簡顏長道二首

古寺長廊院院行此軒偏慰旅人情楚山西斷如迎客
汴水南來故遠城路失玉鈎芳草合林亡白鶴古泉清
淡游何以娛庠老坐聽郊原琢磬聲

竹杖芒鞋取次行下臨官道見人情天寒菽粟猶栖畝
日莫牛羊自入城沽酒獨教陶令醉題詩誰似皎公清
更尋陋巷顏夫子乞取微言繼此聲

滕縣時同年西園

人皆種榆柳坐待十畝陰我獨種松柏守此一寸心君

看閭里間盛衰日駸駸種木不種德聚散如飛禽老時
吾不識用意一何深知人得數士重義忘千金西園手
所開珍木來千岑養此霜雪根遲彼鸞鳳吟池塘得流
水龜魚自浮沉幽桂日夜長白花亂青衿豈獨富草木
子孫已成林拱把不知數會當出千尋樊侯種梓漆壽
張富華簪我作西園詩以為里人箴

次韻王廷老和張十七九日見寄

霜葉投空雀啁籬上樓筋力強扶持對花把酒未甘老

膏面染鬚聊自欺無事亦知君好飲多才終恐世相縻
請看平日銜杯口會有金椎為控頤

次韻參寥師寄秦太虛三絕句時秦君舉進士
不得

秦郎文字固超然漢武憑虛意欲仙底事秋來不得解
定中試與問諸天

一尾追風抹萬蹄崑崙玄圃謂朝隤回看世上無伯樂
却道鹽車勝月題

得喪秋毫久已冥不須聞此氣崢嶸何妨却伴參寥子
無數新詩咳唾成

與參寥師行園中得黃耳蕈

遣化何時取衆香法筵齋鉢久淒涼寒蔬病甲誰能採
落葉空畦半已荒老楮忽生黃耳菌故人魚致白芽薑
蕭然放筯東南去又入春山筍蕨鄉

百步洪二首

并叙

王定國訪余于彭城一日棹小舟與顏長道携盼英卿

三子游泗水北上聖女山南下百步洪吹笛飲酒乘月
而歸余時以事不得往夜着羽衣佇立於黃樓上相視
而笑以為李太白死世間無此樂三百餘年矣定國既
去逾月復與參寥師放舟洪下追懷曩游已為陳迹喟
然而歎故作二詩一以遺參寥一以寄定國且示顏長
道舒堯文邀同賦云

長洪斗落生跳波輕舟南下如投梭水師絕叫鳧鴈起
亂石一線爭磋磨有如兔走鷹隼落駿馬下注千丈坡

斷絃離柱箭脫手飛電過隙珠翻荷四山眩轉風掠耳
但見流沫生千渦嶮中得樂雖一快何異水伯夸秋河
我生乘化日夜逝坐覺一念逾新羅紛紛爭奪醉夢裏
豈信荆棘埋銅駝覺來俯仰失千劫回視此水殊委蛇
君看岸邊蒼石上古來篤眼如蜂窠但應此心無所住
造物雖駛如余何回船上馬各歸去多言嘵嘵師所呵
佳人未肯回秋波幼輿欲語防飛梭輕舟弄水買一笑
醉中蕩槳肩相磨不似長安閭里俠貂裘夜走燕脂坡

獨將詩句擬鮑謝涉江共採秋江荷不知詩中道何語
但覺兩頰生微渴我時羽服黃樓上坐見織女初斜河
歸來笛聲滿山谷明月正照金叵羅奈何捨我入塵土
擾擾毛羣欺卧駝不念空齋老病叟退食誰與同委蛇
時來洪上看遺迹忍見屐齒青苔窠詩成不覺雙淚下
悲吟相對惟羊何欲遣佳人寄錦字夜寒手冷無人呵

送參寥師

上人學苦空百念已灰冷劍頭惟一吷焦穀無新穎胡

為逐吾輩文字爭蔚炳新詩如玉雪出語便清警退之
論草書萬事未嘗屏憂愁不平氣一寓筆所騁頗怪浮
屠人視身如丘井頽然寄淡泊誰與發豪猛細思乃不
然真巧非幻影欲令詩語妙無厭空且靜靜故了羣動
空故納萬境閱世走人間觀身卧雲嶺醎酸雜衆好中
有至味永詩法不相妨此語當更請

夜過舒堯文戲作

先生堂前霜月苦弟子讀書喧兩廡推門入室書縱橫

蠟紙燈籠晃雲母先生骨清少眠卧長夜默坐數更鼓
耐寒石硯欲生水得火銅餅如過雨郎君欲出先自替
坐客斂衽誰敢侮明朝阮籍過阿戎應作羲之羨懷祖

十月十五日觀月黃樓席上次韻

中秋天氣未應殊不用紅紗照坐隅山下白雲橫匹素
水中明月卧浮圖未成短棹還三峽已約輕舟泛五湖
為問登臨好風景明年還憶使君無

荅王定民

開緘奕奕滿銀鈎書尾題詩語更道八法舊聞宗長史
五言今復擬蘇州筆蹤好在留臺寺旗隊遙知到石溝
欲寄鼠須并蠶紙請君章草賦黃樓

次韻王廷老退居見寄二首

浪蘂浮花不辨春歸來方識歲寒人回頭自笑風波地
閉眼聊觀夢幻身北牖已安陶令榻西風遠避庾公塵
更搔短髮東南望試問今誰裏舊巾

接果移花看補籬腰鎌手斧不妨持上都新事長先到

老圃閒談未易欺，釀酒閉門開社甕。
殺牛留客解耕縻，何時得見纖纖玉。
右手持盃左捧頤。

次顏長道韻送傅倅

兩見黃花掃落英，南山山寺遍題名。
宗成不獨依岑范，魯衛終當似弟兄。
去歲雲濤浮汴泗，與君泥土滿衣纓。
如今別酒休辭醉，試聽雙洪落後聲。

雲龍山觀燒得雲字

丁女真水妃，寒山便火耘。
隕霜知已殺，坯戶聽初焚。
束

縕方熠燿敲石俄氤氲落點甘泉烽橫煙楚塞氛窮地
上喬木潛蛟躡浮雲驚飛墮傷鴈狂走迷癡磨谷蟄起
蜩鷺山妖竄夔夔野竹爆哀聲幽桂飄冤芬悲同秋照
蜩快若夏燎蚊火牛入燕壘燧象奔吳軍崩騰井陘口
萬馬皆朱幘搖曳驪山陰諸姨爛紅裙方隨長風卷忽
值絕澗分我本山中人習見非獨聞偶從二三子來訪
張隱君君家亦何有物象移朝曛把酒看飛燼空庭落
繽紛行觀農事起畦隴如縵紋細雨發春穎嚴霜倒秋

黃始知一炬力洗盡狐兔羣

和田國博喜雪

疇昔月如畫曉來雲暗天
玉花飛半夜翠浪舞明年
螟螣無遺種流亡稍占田
歲豐君不樂鐘磬幾時編

四有服不

樂

祈雪霧猪泉出城馬上作贈舒堯文

二年走吳越踏遍千里山
朝隨白雲去莫與栖鴉還
翻如得木狖飛步誰能攀
一為符竹累坐老敲榜間
此行

亦何事聊散腰脚頑浩蕩城西南亂山如玦環山下野
人家桑柘雜榛菅歲晏風日暖人牛相對閒薄雪不蓋
土麥苗稀可刪願君發豪句嘲詼破天慳

次韻舒堯文祈雪霧猪泉

長笑地醫一寸腹銜冰吐雹何時足蒼鵝無罪亦可憐
斬頸橫盤不敢哭豈知泉下有猪龍卧枕雷車踏陰軸
前年太守為旱請雨點隨人如撒菽

傳飲之曾禱此泉得雨

太守

歸國龍歸泉至今人詠淇園綠我今又復罹此旱凜凜

疲民在溝瀆却尋舊迹叩神泉坐客仍携王子淵

飲之時客

惟舒在笑

看草中和樂職頌新聲妙語慰華顛曉來泉上東

風急須上冰珠老蛟泣怪詞欲逼龍飛起嶮韻不量吾
所及行看積雪厚埋牛誰與春工掀百蟄此時還復借
君詩餘力汰輶仍貫笠揮毫落紙勿言疲驚龍再起震
失匙

石炭

并引

彭城舊無石炭元豐元年十二月始遣人訪獲於州之

西南白土鎮之北以冶鐵作兵犀利勝常云

君不見前年雨雪行人斷城中居民風裂肝濕薪半束
抱衾裯日莫敲門無處換豈料山中有遺寶磊落如礪
萬車炭流膏迸液無人知陣陣腥風自吹散根苗一發
浩無際萬人鼓舞千人看投泥潑水愈光明燦玉流金
見精悍南山栗林漸可息此山頑鑛何勞鍛為君鑄作
百鍊刀要斬長鯨為萬段

人日獵城南會者十人以身輕一鳥過槍急萬

人呼為韻軾得鳥字

兒童笑使君憂愠長悄悄誰拈白接離令跨金腰褭東
風吹濕雪手冷怯清曉忽發兩鳴鶻相趁飛蟲小放弓
一長嘯目送孤鴻矯吟詩忘鞭轡不語頭自掉歸來仍
脫粟鹽豉煮芹蓼何似雷將軍兩眼霜鶻咬黑頭已為
將百戰意未了馬上倒銀餅得免不暇燎少年負奇志
蹭蹬百憂繞回首英雄人老死已不少青春還一夢餘
年真過鳥莫上呼鷹臺平生笑劉表

將官雷勝得過字代作

胡騎入雲中急烽連夜過短刀穿虜陣濺血貂裘浣一
來輦轂下愁悶惟欲卧今朝從公獵稍覺天宇大一雙
鐵絲箭未發手先唾射殺雪毛狐腰間餘一箇

臺頭寺步月得人字

風吹河漢掃微雲步屨中庭月趁人浥浥爐香初泛夜
離離花影欲搖春遙知金闕同清景想見氍毹車碾暗塵
回首舊游真是夢一簪華髮岸綸巾

臺頭寺送宋希元

相從傾蓋只今年送別南臺便黯然入夜更歌金縷曲

他時莫忘角弓篇

是日與宋君同栽松寺中

三年不顧東鄰女

取宋玉

二頃方求負郭田

取李

我欲歸休君未可茂先方議斲

龍泉

種松得徠字

其四在懷古堂其六在石經院

春風吹榆林亂英飛作堆荒園一雨過戢戢千萬栽青
松種不生百株望一枚一枚已有餘氣壓千畝槐野人

易斗粟云自魯徂徠魯人不知貴萬竈飛青煤束縛同
一車胡為乎來哉泣然解其縛清泉洗浮埃枝傷葉尚
困生意未肯回山僧老無子養護如嬰孩坐待走龍蛇
清陰滿南臺孤根裂山石直幹排風雷我今百日客養
此千歲材時去替
不百日茯苓無消息雙鬢日夜摧古今一俯
仰作詩寄餘哀

作書寄王晉卿忽憶前年寒食北城之游走筆
為此詩

北城寒食煙火微落花蝴蝶作團飛王孫出游樂忘歸
門前驄馬紫金鞵吹笙帳底煙霏霏行人舉頭誰敢睇
扣門狂客君不麾更遣傾城出翠幃書生老眼省見稀
畫圖但覺周昉肥別來春物已再菲西望不見紅日圍
何時東山歌采薇把盞一聽金縷衣

往在東武與人往反作槩字韻詩四首今黃魯
直亦次韻見寄復和荅之

符堅破荊州止獲一人半中郎老不過但喜識元歎我

今獨何幸文字厭奇玩又得天下才相從百憂散陰求
我輩人規作林泉伴寧當待垂老倉卒收一旦不見梁伯
鸞空對孟光案才難不其然婦女厠周亂世豈無作者
於我如既盥獨喜誦君詩咸韶音節緩夜光一已多矧
獲纍纍貫相思君欲瘦不往我真懦吾儕眷微祿寒夜
抱寸炭何時定相過徑就我乎館飄然東南去江水清
且渙相與訪名山微言師忍樛

雪齋

杭僧法言作
雪山於齋中

君不見峨眉山西雪千里北望成都如井底春風百日
吹不消五月行人如凍蟻紛紛市人爭奪中誰信言公
似贊公人間熱惱無處洗故向西齋作雪峰我夢扁舟
適吳越長廊靜院燈如月開門不見人與牛惟見空庭
滿山雪

言有詩見寄云林
下閒看水牯牛

以雙刀遺子由子由有詩次其韻

寶刀匣不見但見龍雀鏐何曾斬蛟蛇亦未切琅玕胡
為穿窬輩見之要領寒吾刀不汝問有愧在其肝念此

力自藏包之虎皮斑湛然如古井終歲不復瀾不憂無
所用憂在用者難佩之非其人匣中自長歎我老衆所
易屢遭非意干惟有王玄通堦庭秀芝蘭知子後必大
故擇刀所便屠狗非不用一歲六七刈欲試百鍊剛要
須更泥蟠作詩銘其背以待知者看

游桓山會者十人以春水滿四澤夏雲多奇峰

為韻得澤字

東郊欲尋春未見鶯花迹春風在流水鳬鴈先拍拍孤

帆信溶漾弄此半篙碧艤舟桓山下長笑理輕策彈琴
石室中幽響清磬磬弔彼泉下人野火尖枯腊悟此人
間世何者為真宅暮回百步洪散坐洪上石愧我非王
襄子淵肯見客臨流吹洞簫水月照連壁謂王氏兄弟也此歡
真不朽回首歲月隔想象斜川游作詩繼彭澤

戴道士得四字代作

少小家江南寄迹方外士偶遇白雲出賣藥彭城市雪
霜侵鬢髮塵土汙冠袂賴此三尺桐中有山水意自從

夷夏亂七絲久已棄心知鹿鳴三不及胡琴四使君獨
慕古嗜好與衆異共吊桓魋宮一灑孟嘗淚歸來鎖塵
匣獨對斷絃喟挂名石壁間寂寞千歲事

次韻田國博部夫南京見寄二絕

歲月翩翩下坂輪歸來杏子已生仁深紅落盡東風惡
柳絮榆錢不當春

火冷錫稀杏粥稠青裙縞袂餉田頭大夫行役家人怨
應羨居鄉馬少游

月夜與客飲酒杏花下

杏花飛簾散餘春
明月入戶尋幽人
褰衣步月踏花影
烟如流水涵青蘋
花間置酒清香發
爭挽長條落香雪
山城薄酒不堪飲
勸君且吸盃中月
洞簫聲斷月明中
惟憂月落酒杯空
明朝卷地春風惡
但見綠葉棲殘紅

送蜀人張師厚赴殿試二首

忘歸不覺鬢毛斑
好事鄉人尚往還
斷嶺不遮西望眼
送君直過楚王山

雲龍山下試春衣
放鶴亭前送落暉
一色杏花紅十里
新郎君去馬如飛

再次韻荅田國博部夫還二首

西郊黃土沒車輪
滿面風埃笑路人
已放役夫三萬指
從教積雨洗殘春

枝上稀疏地上稠
忍看紅糝落牆頭
風流別乘多才思
歸赴西園秉燭游

田國博見示石炭詩有鑄劍斬佞臣之句次韻

荅之

楚山鐵炭皆奇物知君欲斫姦邪窟屬鏤無眼不識人
楚國何曾斬無極玉川狂直古遺民救月裁詩語最真
千里妖墓一寸鐵地上空愁蟻蟲臣

荅郡中同僚賀雨

水旱行十年饑疫遍九土奇窮所向惡歲歲祈晴雨雖
非為已求重情終愧古鬼神亦知我老病入腰膂何曾
拜向人此意難不許重雲淒已合微潤先流礎蕭蕭止

還作坐聽及三鼓天明將吏集泥土滿靴屨登城望薊
麥綠浪風掀舞愧我賢友生雄篇闢新語君看大熟歲
風雨占十五天地本無功祈禳何足數渡河不入境豈
若無蝗虎而况刑白鷺下策君勿取

罷徐州往南京馬上走筆寄子由五首

吏民莫扳援歌管莫悽咽吾生如寄耳寧獨為此別別
離隨處有悲惱緣愛結而我本無恩此啼誰為設紛紛
等兒戲鞭鞭遭割截道邊雙石人幾見太守發有知當

解笑撫掌冠纓絕

父老何自來花枝裏長紅洗琰拜馬前請壽使君公前
年無使君魚鼈化兒童舉鞭謝父老正坐使君窮窮人
命分惡所向招災凶水來非吾過去亦非吾功

古汴從西來迎我向南京東流入淮泗送我東南行暫
別還復見依然有餘情春雨漲微波一夜到彭城過我
黃樓下朱欄照飛甍可憐洪上石誰聽月中聲

前年過南京麥老櫻桃熟今年舊游處櫻麥半黃綠歲

月如宿夕人事幾反覆青衫老從事坐穩生髀肉聯翩
閱三守迎笑如轉轂歸耕何時決田舍我已卜

卜田向何許石佛山南路下有爾家川千畦種杭稌山
泉宅龍厓平地走膏乳異時畝一金近欲為逃戶逝將
解簪紱賣劍買牛具故山豈不懷廢宅生篙櫓便恐桐
鄉人長祠仲卿墓

次韻曾九章見贈

遽瑗知非我所師流年已似手中箸正平獨肯從文舉

中散何曾靳孝尼賣劍買牛真欲老得錢沽酒更無疑
雞豚異日為同社應有千篇唱和詩

書泗州孫景山西軒

落日明孤塔青山繞病身知君向西望不愧塔中人

過淮三首贈景山兼寄子由

好在長淮水十年三往來功名真已矣歸計亦悠哉今
日風憐客平時浪作堆晚來洪澤口捍索響如雷

過淮山漸好松檜亦蒼然藹藹藏孤寺泠泠出細泉故

人真吏隱小檻帶巖偏却望臨淮市東風語笑傳

回首淮陽幕簿書高沒人何時桐柏水一洗庾公塵此
去漸佳境獨游長慘神待君詩百首來寫浙西春

舟中夜起

微風蕭蕭吹菰蒲開門看雨月滿湖舟人水鳥兩同夢
大魚驚竄如奔狐夜深人物不相管我獨形影相嬉娛
暗潮生渚吊寒蚓落月挂柳看懸蛛此生忽忽憂患裏
清境過眼能須臾雞鳴鐘動百鳥散舫頭擊鼓還相呼

余去金山五年而復至次舊詩韻贈寶覺長老
誰能斗酒博西涼但愛齋厨法鼓香舊事真成一夢過
高談為洗五年忙清風偶與山阿曲明月聊隨屋角方
稽首願師憐久客直將歸路指茫茫

遊惠山

并叙

余昔為錢塘倅往來無錫未嘗不至惠山既去五年復
為湖州與高郵秦太虛杭僧參寥同至覽唐處士王武
陵實郡朱宿所賦詩愛其語清簡蕭然有出塵之姿追

用其韻各賦三首

夢裏五年過覺來雙鬢蒼還將塵土足一步漪瀾堂俯
窺松桂影仰見鴻鶴翔炯然肝肺見已作冰玉光虛明
中有色清淨自生香還從世俗去永與世俗忘

薄雲不遮山疎雨不濕人蕭蕭松徑滑策策芒鞋新嘉
我二三子皎然無緇磷勝游豈殊昔清句仍絕塵弔古

泣舊史疾譏歌小旻哀哉扶風子難與巢許隣

謂竇羣

敲火發山泉烹茶避林樾明牕傾紫琰色味兩奇絕吾

生眠食耳一飽萬想滅頗笑玉川子饑弄三百月豈如
山中人睡起山花發一甌誰與共門外無來轍

贈惠山僧惠表

行遍天涯意未闌將心到處遣人安山中老宿依然在
案上楞嚴已不看歌枕落花餘幾片閉門新竹自千竿
客來茶罷空無有盧橘楊梅尚帶酸

贈錢道人

書生苦信書世事仍臆度不量力所負輕出千金諾當

時一快意事過有餘忤不知幾州鐵鑄此一大錯我生
涉憂患常恐長罪惡靜觀殊可喜脚淺猶容却而况錢
夫子萬事初不作相逢更何言無病亦無藥


與秦太虛參寥會于松江而闕彥長徐安中適
至分韻得風字二首

吳越溪山興未窮又扶衰病過垂虹浮天自古東南水
送客今朝西北風絕境自忘千里遠勝游難復五人同
舟師不會留連意擬看斜陽萬頃紅

二子緣詩老更窮人間無處吐長虹平生睡足連江雨
盡日舟橫擘岸風人笑年來三黜慣天教我輩一樽同
知君欲寫長相憶更送銀盤尾鬣紅

次韻闕令送魚

舉網驚呼得巨魚饒涎不易忍流酥更煩赤腳長鬚老
來趁西風十幅蒲



東坡全集卷十